

摘藻堂四庫全書薈要

集部

欽定四庫全書會要

集部

中州集卷四



詳校官候選知縣臣吳甸華

欽定四庫全書蒼要卷二萬七十七

集部

中州集卷四 丁集

金元好問輯

常山周先生昂 一百首

昂字德卿真定人父伯祿字天錫師事玄真先

生褚承亮

承亮字茂先宣和六年擢第調易州戶曹會皇子郎君破真定拘境內進

士七十二人赴安國寺試策策目上皇不道少主失信舉人希旨極口毀詆茂先離席揖王文

劉侍中言君父之過豈臣子所當言長揖而出劉為之動容比梅除茂先被黜餘悉放第狀元

許必輩自號七十二賢榜帥府重其名檄茂先以易州司戶知橐城漫一應之尋解印去年七

十終弟子謚為玄真先生

大定初第進士仕至同知沁南軍

節度使事德卿年二十一擢第釋褐南和簿有

異政遷良鄉令入拜監察御史路宣叔以言事

被斥德卿送以詩坐謗訕停銓久之起為龍州

都軍以邊功得復召超三司判官大安軍興權

行六部員外郎德卿傳其甥王從之文法云文

章工於外而拙於內者可以驚四筵而不可以

適獨坐可以取口稱而不可以得首肯又云文章以意為主以字語為役主強而役弱則無令不從今人往往驕其所役至跋扈難制甚者反役其主雖極辭語之工而豈文之正哉德卿初有常山集喪亂後不復見從之能記三百餘首因得傳之屏山故人外傳云德卿以孝友聞又喜名節藹然仁義人也學術醇正文筆高雅以杜子美韓退之為法諸儒皆師尊之既歷臺省

為人所擠竟坐詩得罪謫東海上十數年始入
翰林言事愈切出佐三司非所好從宗室承裕
軍承裕失利跳走上谷衆欲逕歸德卿獨不可
城陷與其從子嗣明同死於難嗣明字晦之短
小精悍有古俠士風年未三十交游半天下識
高而志大善談論而中節作詩喜簡澹樂府尤
溫麗最長於義理之學下筆數千言初不見其所
從來試於府於禮部俱第一擢第主涑水簿

從其叔北征得還而不忍去使晦之不死文字
不及其叔而理性當過之嘗謂學不至邵康節
程伊川非儒者也其說類此而天不假年悲夫

晚望

烟抹平林水退沙碧山西畔夕陽家無人解得詩中意
只有雲邊數點鴉

香山

山林朝市兩茫然紅葉黃花自一川野水趣人如有約

長松閱世不知年，千篇未暇償詩債。
一鉢聊從結淨緣，欲問安心心已了。
手書誰識是生前。

有感

壯心未分逐流年，衰鬢從渠衆目憐。
却恨詩情消滅盡，語言枯淡到中邊。

冷巖行賦冷巖相公所居

冷巖賢宰相宗室，永貞自號也。

或為孟，或為鍾，人心自異山本同。
天清雲遠闕不極小，孤宛在江流中。
澗之毛可筐，管山之木可斤斧。
唯有白

雲高崔嵬風吹不消自太古峴山何竒羊子所攀東山
何秀謝公往還今爾胡為藉甚乎人間于嗟乎冷山

早起

覆斗臨霜閣號鐘滿夜城飛揚他日事去住此時情文
字闕留滯塵沙管送迎百年今已半凜凜畏虛生

曉望

曉樹雲重隱春城日半陰蒼茫塵土眼恍惚歲時心流
落隨南北才華閱古今柴荆生事窄寧憶二疏金

羈旅

羈旅情方慘，暄寒氣尚膠。
谷風連遠陣，原樹鬱春梢。
要路嗟何及，浮名久已拋。
百年麤飯在，真欲事誅茅。

早春

小雪寒仍在，烟花意已深。
老侵長路鬢，春蕩故園心。
幸可追沂詠，何勞費越吟。
微躬應自愛，莫作愧千金。

雪

小雪莫能繁，愁雲久更昏。
細燈寒出戶，欹樹老當軒。
竹

葉舊時釀梅花何處村賦詩空入夜愁絕與誰論

雨過

雨暎高簷過山開晚日明動雲方潰擁號水未休爭沙
岸龜鼉出荒庭鶴鶴行草泥沾屐齒杖策有餘清

晚步

鬱鬱孤城隘飄飄絕塞游短衣忘遠步高興會清秋白
水深樵谷黃雲古戍樓居人半裘毯橫管莫生愁

夜

門巷溪聲爽衣裳夜氣蘇地清林影散月靜桂花孤左
省詩頻詠南樓興不辜關山冰雪裏何處覓天隅

晚望

疊嶂何時出荒城落日低音書雲去北烽火客愁西鷹
隼乘秋擊狐狸倚暮啼吟詩且排悶佳句敢攀躋

獨酌

渺渺清溪濶悠悠弱藻沈客衣臨水靜鳥影過船深暫
把魚竿坐因知靜者心滄洲高興動巢父可東尋

秋夜

高閣鍾初殷層城月未光
淨空含宇大卧斗帶星長
暗
覺巢烏動清聞露菊香
誰家砧杵急應怯莫天涼

對月

月近天河白秋深夜氣清
蛛絲時隱見兔杵正分明
敲
帽中宵落孤舟幾處行
清風殊未發樹穩鵲休驚

促織

促織來何處秋風暗與期
苦吟人不解多恨爾如知
獨

枕難安夜寒衣欲及時凌晨攬清鏡一半已成絲

溪南

小徑通沙穩清溪帶樹深岸危低白屋雲近沒青岑洒
落高秋氣飛騰志士心雲臺與麟閣莫遣二毛侵

繼人韻

高興秋方逸幽居晚見過歡交寧厭數詩好不論多五
字含風雅千篇費琢磨自知才力拙相報欲如何

送李天英下第

不須寂寞恨東歸
洗眼三年看一飛
試捲波瀾入毫穎
莫教歐九識劉幾

宿西藍

聞道西藍好能來
定有綠青山避喬木
流水信平田步
屨迷深竹題詩惜
暮烟塵心狀翻倒
一室暫安禪

北湖清明

碧水隨時酒春風
著處花歡娛萬國
本富貴五侯家金
動樓頭管香迴日
莫車老夫唯欲睡
兒女莫相誇

中秋夜高陽對月

端正高陽月空庭又見過清風禁睡得白髮奈愁何尚
識王良策難知織女梭金波流汨汨應為照滄沓

丘家庄早發

渡馬危橋立村鷄暗樹號星稀白水濶霧重黑山高外
物誰能必人生會有勞鷗鵬終變化早晚借風濤

邊月

邊月弓初滿山城角尚孤中天看獨立永夜興誰俱未

覺風生暈空懷斗轉隅含情知白兔欲下更踟躕

侍祠太室

設燎彤庭敞懸燈玉殿深星河含爽朗城闕動陰沈祇慄
誠初薦馨香德已歆清風動雲幕有喜見神心

夜步

擊柝隣居靜開門宿鳥驚西風秋半急北斗夜深明獨
立乾坤大徐行杖屨輕遙怜漢宮闕重露濕金莖

宋文貞公廟

開元四荒不動塵柱石中原有老臣
襄土一丘松柏暗
長安三日荔枝新

讀陳後山詩

子美神功接混茫人間無路可升堂
一斑管內時時見
賺得陳郎兩鬢蒼

偶書

幽陰不放終年樹好味仍餘盡日茶
詩業未降心有種
世緣初盡眼無花

失子

白髮飄蕭老病身，幾因兒女淚沾巾。
虛談誤世王夷甫，只有情鍾語最真。

北行即事二絕句

聞道崑崙北風塵，避僕窪至今悲漢節。
不合度流沙

又

五月分衣節三軍受甲時，莫教麟閣將頻發。
羽林兒

邊月

驅車宿雙浦極目耿金波不有中秋景其如永夜何沙
分疑白雪練失想明河桂樹元無意南傾獨好柯

晨起

鼓聲隨曉角合沓起平荒宿火連岡小寒星墮水長鯨
翻驚日動馬食快宵涼白首登壇將功名好自強

西城道中

草路幽香不動塵細蟬初向葉間聞溟濛小雨來無際
雲與青山淡不分

醉經齋為虞鄉麻長官賦

詩書讀破自融神不羨雲安麴米春黃卷至今真味在
莫將糟粕待前人

清放齋

平生眼白嫌物俗此身誰要冠帶束茶甌飯飽一飲足
卧聽松風仰看屋

孫資深歲寒堂

世態浮雲日夜移春蘭秋菊各爭時此心鐵石無人會

唯有庭前柏樹知

登綿山上方

環合青峰插劍長，小平如掌寄禪房。
危闌半出雲霄上，祕景盡收天地藏。
野濶羣山驚破碎，雲低滄海認微茫。
九華籍甚因人顯，迴秀可憐天一方。

謁先主廟

暗粉陳丹半在亡，短垣殘日共悲涼。
不須古碣書綿竹，自有荒村紀葆桑。
塵土衣冠曾繫馬，歲時歌舞亦稱觴。

不應巴蜀江山麗能使英靈忘故鄉

送客

相見席不暖送行情更牽只愁人面隔不放馬蹄前塞
迥雲垂地溪平水接天山川後期濶把臂兩茫然

莫州道中

大陵河東古莫州居人小屋如蝸牛屋邊向外何所有
唯見白沙纍纍堆山丘車行沙中如倒拽風驚沙流失
前轍馬蹄半跛牛領穿三步停鞭五步歇雞聲人語無

四鄰晚風蕭蕭愁殺人
人有禱沙應神遼東老兵非使
臣何必埋却雙行輪

即事二首

憂患年來坐讀書
田園拋却任荒蕪
目前却得晨昏力
碌碌無由似阿奴

又

遠目傷心千里餘
凜然真覺近狼須
雲邊處處是青塚
馬上人人皆白鬚
正憶荒村臨古道
不堪獨樹點平蕪

誰人與話西園路梅竹而今似畫圖

感秋

秋氣入行帳愁人中夜知雞聲與人語耿耿異常時清
晨起危坐感歎不自持義和馭飛轂往返無停期春草
如昨日已復悲離離顧謂鏡中髮爾衰安得遲結束媚
鞍馬荒山去委蛇黃花泣宵露綠野含晨曦吾事久不
諧悠悠隨所之有懷南澗約敢賦北山詩

對月

月滿秋仍早臺高夜未徂水光先剡淡星影失踟躕玉
帳傳更急荒城擊柝孤去年雙淚眼依舊入平蕪

鵲山

西征疲短服北望慘衰顏再宿殊雞舍相看獨鵲山旆
沾新雨過鳥逐暮雲還白首瞻星漢何時鼓角閒

望山中松

地險蟠根古人稀小徑消雨斂開白雪風響入青霄未
畏斧斤逼惟愁霹靂燒解鞍那避遠冷色故相招

利涉道中寄子端

行武昌望利涉高青烟低白雪岡陵瀰漫溝澮滅氤氲
冷日從東來照我清影忽作溪水卧明月凌兢羸馬蝟
毛縮詰曲微行蛇腹裂遺鞭脫鐙初不知指僵欲墮骨
欲折羶裘毛襪良可念我自無備誰從輟人家土榻借
微暖坐久清冰落鬚頰黃花臞仙怯風馭久向笙歌窟
中蟄徑須持此遠相餉一洗夜堂花酒熱

即事二首

不堪華髮半頭生
老去偏添愛媿情
新得家書來報喜
舊時龜子遶床行

又

一床安置似僧居
白髮忘梳動月餘
懶性漸成愁把筆
小詩常擬倩人書

九日

不堪馬上逢佳節
況是天涯望故鄉
高會未容陪戲馬
舊游空復憶臨香
癡雲黯黯方垂地
小雪霏霏欲度墻

猶賴多情數枝菊肯留金蕊待重陽

對月

萬里寥天月相隨不憚勞屢添華髮滿曾傍黑山高影
動新瓊杵光含舊寶刀常娥應見訝獨宿弊綈袍

翠屏口七首

去歲翠屏下東流看湧波愁將新鬢髮還對舊關河翅
健翻秋隼峰高並晚馳草深饒虎跡夜黑欲誰過

又

地擁河山壯闕營
劍甲重馬牛來細路
燈火出寒松
刁斗方嚴夜羔裘
欲禦冬可憐天設險
不入漢提封

又

玉帳初鳴鼓金鞍半偃弓
傷心看塞水對面隔華風
山去何時斷雲來本自通
不須驚異域曾在版圖中

又

野蔓梢駝架輕泥濺馬鞍
徑斜來險石溪急上清灘
羽檄千山靜羔裘六月寒
長松空夾道蕭颯不成看

又

旌節瞻前帳
風塵識舊坡
眼平青草短
情亂碧山多
晚起方投筆
前驅効執戈
馬蹄須愛惜
留渡北流河

又

萬里來崩豁
終年氣慘悽
地窮青澗斷
天近玉繩低
亭窟黃沙北
崑崙白雪西
故園何處覓
搔首意空迷

又

塞古秋風早
山昏落日低
積雲鴉度久
荒岸馬歸齊
燈

火看時出茅茨漸欲迷塵沙恨于役况乃對雞栖

邊俗

返闔看平野斜垣逐慢坡馬牛雖異域雞犬竟同窠木
杵春晨急糠燈照夜多淳風今已破征歛為兵戈

山家七首

秋日山田熟山家趣轉奇壠苞銀粟綴墻蔓綠雲垂野
飯留佳客青錢付小兒主人愁喪亂數數問邊陲

又

蕭颯晚風涼，高杠引旆長。
嶺雲殘宿陣，陵日湛晨光。
已作依劉表，終須問葛疆。
俯身馳萬里，未覺鬢毛蒼。

又

年深師欲老，秋至敵還輕。
但使財思義，猶多死易生。
指揮無險阻，感激在精誠。
萬古麒麟閣，何曾浪得名。

又

簡易軍中事，川原入望多。
草平鋪碧錦，山遠出青螺。
遠愧桃花水，重臨杏子河。
去年關塞意，蕭颯起悲歌。

又

赤磧蟠雙闕青山壯一門放歌遊遠目箕踞得高原地
險勞天設邊戈厭日屯廟謀新控扼萬里可雄吞

又

官舍暫投轄塞垣還着鞭路移新歲月心醉好山川方
丈何由到桃源恐浪傳相看不隔水遺恨惜他年

又

翡翠長松秀氎毼細草斑屢經新渡水不數舊看山太

華愁登陟終南費引攀豈知圖畫景長在馬蹄間

北行二首

卸鞍休馬倦解橐罷馳鳴細雨侵衣急長郊入卧平溪
喧看水滿山黑厭雲生莫恠龍行數應知欲洗兵

又

比歲頻分甲今年賀息兵競誇新戰士誰識舊書生北
塞甘長別南天欲遠征二年迎復送空媿秦州城

山丹花

浪蘂誰能記山丹舊所聞
卷花翻碧草低地落紅雲塞
雨沾衣久溪風入把勤莫言
羌婦醜誰識漢昭君

春日即事

凍柳僵榆未改容
狐裘貂帽尚宜風
欲尋把酒渾無處
春在鳴鳩谷谷中

寄金山長老

庭前雙柏樹作別似晨朝
書信隨溪茗音聲落海潮
嶺雲閒可翫邊月苦無慘
相見愁他日風沙兩鬢凋

寄王子明

病起身仍懶眠多意尚迷筆成今夕把書似隔年題久
恨心期阻難邀物理齊燈花應解事岑寂向人低

無題

西風吹白水日莫動寒威野帳收旗盡奚兒飲馬歸梢
梢聞鳥過慘慘見雲飛夜黑多豺虎荒村定敢依

萱草

萬里黃萱好風煙接路傍迹踈雖異域心密竟中央染

練成初色移瓶得細香
客愁無路遣始為看花忘

得家書

窮愁非昔境白髮有深根
淚破孤城郡書來萬里村
鴈聲寒日夜秋色老乾坤
為問遊方子何時慰倚門

書齋

夜雨書齋冷西風木葉拋
暗蛩侵壞壁低鴈落寒郊
壯志初嘗膽吾生豈繫匏
草玄雖閉戶未用客相嘲

聞蟬

冥機辭委蛻天籟發幽嘶迴露增晨洗清風借晚攜暫
成千里隔還作一枝低客思饒相觸愁時故不齊

晚陰不成

落日明西極高雲暗朔方樓臺分照耀宇宙一蒼茫不
借蛟龍便虛成燕雀忙何須遣雷怒鬱鬱繞高梁

竇氏園亭二首

雲樹春秋色風泉日夜聲過庭高幕暗吹簟轉雷驚翠
袖擎詩罷銀壺得酒傾平生耽野趣到此眼偏明

又

磴鑿蒼崖破池通碧澗流
憩深憐洞室吟穩憶扁舟
谷口堪高隱河梁厭遠遊
卜居真此地幽寂更何求

即事二首

南苑霓旌動繚牆天街蓮燭照脩廊
斗南絳氣風吹盡
小雨濛濛濕建章

又

楊花顛倒入簾櫳
睡鴨香殘碧霧空
盡日尋詩尋不得

鵲鵲聲在夢魂中

代書寄大元伯

南園臘蟻記同傾一紙書來萬里情
日夜愁心隨柳色
東風吹滿大梁城

和路宣叔梅

月底明肌粲壽陽道人呼入竹西堂
安排臘味千鍾酒
消破春風萬斛香
花鳥有情應見惜
蛾眉傾國故難藏
西湖骨朽東坡遠
又為君詩惱一場

新秋

畏日經時暑清秋一夕涼真堪近燈火不復病衣裳
宋玉悲搖落安仁愧老蒼鄙夫那及此睡美百憂忘

靳子溫欸春亭

曾數花鬚傷藥闌春風不到酒杯寬自憐白首荒三徑
桃李年年擔上看

底柱圖

鬼門幽險深百篙人門逼窄逾兩牢舟人叫渡口流血

性命咫尺輕鴻毛
開圖頓覺風雷怒
素髮飄蕭激衰腐
河來天上石不移
安得此心如底柱

寒林七賢

苦寒如此欲何之
雪帽風裘意自奇
縱有清詩三百首
未應肯得党家兒

過省冤谷

嬰兒偃蹇正堪孩
換得山西老將回
往者不追來不戒
莫將家世論人材

魯直墨跡

詩健如提十萬兵東坡真欲避時名須知筆墨渾閒事
猶與先生抵死爭

讀柳詩

功名翕忽負初心行和騷人澤畔吟開卷未終還復掩
世間無此最悲音

憶劉及之

千株何處封君橘二頃誰家負郭田長路風塵空費日

故園書札動經年未能免俗真聊爾不為懷憂亦悄然
襟抱何人與開釋論文除得老臞仙

家園

五畝園連竹三間屋向陽氣和春浩蕩心靜日舒長花
鳥成相識琴書付兩忘陶然一尊酒誰復記羲皇

晚望

獨立孤城上關山望不休異鄉驚絕域遠目豁清秋未
擬登樓作空歌出塞愁故園飛鳥外溪水正南流

水南晚眺

小徑通沙穩清溪帶樹深岸危低白屋雲近沒青岑灑
落高秋氣飛騰志士心賦詩增感激流水是知音

正月大風雨

風如渤海勢凌虛寒破貂裘力尚餘不是化工難倚賴
也知青帝有驅除

弔張益之

當年讀書山堂中夜喜與君燈火同塵編壞簡如蠹攻

弱質鄙鈍煩磨礪新詩如洗露芒鋒逸氣欲倒浮雲駘
輕裘肥馬世上雄吾徒一飯嘗未充君如孔翠愁彫籠
我亦哀鴻避鳴弓孤城一別天西東幾見黃葉飛霜風
寄書無由魂夢通西望落日銜千峰他時雲雨儻相逢
猶思驚雷起池龍鬼神無賴欺天公哀哉若人竟死窮
自聞君亡阜生胸上訴九闕無路從百年過眼如轉蓬
夢時憂樂覺即空長夜漫漫何時終作詩寄哀投殯宮

別本長夜漫漫
何時終為落句

黃山趙先生澗 三十首

澗字文孺第進士明昌末終於禮部郎中性冲澹學道有得黃山其自號也間問趙公云黃山正書體兼顏蘇行草備諸家體超放又似楊凝式當處黃魯直蘇才翁伯仲間党承旨篆陽冰以來一人而已而以黃山配之至今人謂之党趙有黃山集行於世涼陘云峩峩景明宮五雲湧蓬萊山空白晝永野曠清風來放遠亭云晴

日未消千嶂雪暖風先放一川花青天低處是
平野白鳥去邊明落霞秦村道中云桃花都被
風吹却楊柳似將烟染成其餘多稱此

晚宿山寺

松門明月佛前燈庵在孤雲最上層犬吠一山秋意靜
敲門時有夜歸僧

僊和尚坐脫

識得從來覺性圓西歸隻履更翛然永嘉穩步曾溪路

臨濟飽參黃蘗禪
桶底脫時無一物
機輪轉處有三玄
火中留得一莖草
依舊光明燦大千

黃山道中

小穀城荒路屈蟠
石根寒碧漲秋灣
千章秀木黃公廟
一點飛雲白堦山
好景落誰詩句裏
寒驢馳我畫圖間
膏肓泉石真吾事
莫厭乘閒數往還

郊外

迥野饒秋色
高臺半夕陽
鷗眠沙渚靜
鳥沒嶺雲長
薄

宦違幽興浮生更異鄉
歲華成白首丘壑愈難忘

貢院中懷山中故居

歲晚西溪路誰過
舊草堂苔紋侵柱礎
竹色度隣牆
白首光陰疾
青山意緒長
相思老兄弟
夜夜夢還鄉

貢院聞雨

燈暗風翻幔
葢吟葉擁牆
人如秋已老
愁與夜俱長
滴盡堦前雨
催成鏡裏霜
黃花依舊好
多病不能觴

聚遠臺

獨上平臺上風雲萬里來青山一尊酒落日未能回

秋日感懷

歲月不相饒秋風颭已至蚊雷稍收聲團扇且復置久
雨不宜人新涼差快意數篇東臯詩引我北窗睡林泉
久隔濶塵土作憔悴但有適人適何嘗事吾事一貧既
忘懷所好無不遂世無陶靖節何人知此味

用仲謙元夕詩韻

聞道藍田輞口莊歌湖前日具飛航李膺定已回仙棹

王績無由入醉鄉，薄宦繫人如坐井。窮愁染鬢欲成霜，
早知上界多官府，只向人間作酒狂。

分韻賦雪得雨字

大雪初不知開門，已無路。驚喜視歷日，此瑞固有數池。
冰凍欲合林鴉噤，仍聚已成玉壺瑩。尚作寶花雨造物，
固多才中有無盡。句大兒擬圭壁，小兒比鹽絮。後人例
蹈襲，彌復入窘步。聚星號令嚴，亦自警言未悟。誰有五色
筆，繪此天地素。好語覓不來，更待偶然遇。

和茂才韻

十年為客未還家
贏得毵毵兩鬢華
別後故人應念我
不來踏雪看梅花

留題西溪三絕

誰開玉鑑瀉天光
占斷人間六月涼
日落沙禽猶未散
也知受用藕花香

又

波光湛碧冷無痕
眇眇輕風起縠紋
認得朝來疎雨過

却因水底見飛雲

又

總道西溪畫不如豈知造物用功夫
蟾光忽作靈犀透
表裏通明兩玉壺

九日懷尹無忌

茅屋秋蕭索幽居盡日間碧雲看欲暮
遠客幾時還書
劍成何事風塵只強顏
思君千里夢
夜夜到燕山

立秋

卷四
日月如川流去矣不復回萬物各有管榮悴更相催餘
生苦多艱壯志久摧頽念欲學還丹鬱紆殊未諧今朝
立新秋庭樹西風來舉首望天宇飛雲獨裴徊呼兒且
沽酒浩歌豁秋懷醉中得妙理逸興何悠哉

和崔深道春寒

長風忽落青林端風聲洶若江聲寒太陰盤礴亂天序
推書撲筆成長歎美人何許媚幽獨使我不見心無歡
頗聞隱居誦莊屈蓬窗坐擁塵編殘琴歌酒賦兩寂莫

懸知此興殊未闌
遲君一來吐款要
舉盃放目雲天寬
西城觀水

西山秋水來天地
巨野橫流浩無際
長風覺浪鱗甲生
兩角斜分半山際
繚堤北去接飛橋
鼓鼙洶洶翻驚濤
中流突兀玉山起
直疑河伯驅靈鼇
冷光搖蕩秋雲白
渾似夢中遊震澤
隔林我欲喚漁郎
孤帆忽如過鳥翼
安得酒船常拍浮
四時甘味置兩頭
何人與我同此樂
潁陽試覓元丹丘

盆池荷花

一泓寒碧甃波光，雨後妖紅獨自芳。
不許纖塵汙天質，政須清吹發幽香。
洛神初試凌波襪，妃子來從礬石湯。
休笑埋盆等兒戲，要令引夢水雲鄉。

扈從車駕至荆山

海上飛來碧玉峰，瑤林琪樹更青蔥。
參差樓觀浮雲表，顛倒山光落鏡中。
侍從有臣司碧落，笑談無處不清風。
好分靈沼為膏澤，乞與人間作歲豐。

中秋

秋氣平分月正明
藥珠宮闕對蓬瀛
已驅急雨消殘暑
不遣微雲點太清
簾外清風飄桂子
夜深涼露滴金莖

聖朝不奏霓裳曲
四海歌謠即樂聲

史舜元嘗從文孺學詩說道陵中秋

賞月瑤光樓召文孺對御賦詩以清字為韻道陵讀至落句大加賞異手酌金鍾以賜且字之曰文孺以此鍾賜汝作酒直士林榮之高祖言吾不如子房君父字呼臣下不為無故事也

題齊物堂

至人識破浮生理
萬變何嘗有不同
果蝶夢周周夢蝶

為風乘我我乘風得時未必全無識窮處方知却有通
畢竟欲齊齊底物世間元是一虛空

秋郊晚望

桃竹猶堪杖幽尋興頗嘉池荷能幾葉離菊不多花地
圻成龜兆林枯出犬牙村農慶豐歲社鼓已三搗

元日

馬上逢元日東風送客愁溇池春水渡瀛海夕陽樓雪
照潘郎鬢塵侵季子裘勞生已強半更欲玷清流

過良鄉縣學

儒宮宜地僻，竟日有餘清。
殿古碑仍在，庭空草自生。
風高時脫木，雲重欲摧城。
客興已瀟洒，秋堂更雨聲。

和詵上人雪詩

貧巷仍飛雪，空庭迥絕塵。
照窓疑不夜，着樹忽驚春。
枕冷夢魂短，山明天宇新。
賦詩分氣象，定有灞陵人。

澗上

遠徑留殘照，疎林出小園。
山川半豺虎，歲月且琴尊。
杜

老新雞柵龐公舊鹿門不才真忝竊人道典刑存

新涼

頗覺小眠快便知秋意真清風論世舊老圃得時新移
竹觀君子翻書訪古人可人陶靖節隨意葛天民

過蔣縣董大夫廟

漢朝元不用真儒豈信忠嘉益帝圖賈誼長沙晁錯死
不須獨恨老江都

寓居寫懷

平陸溫風雪半消孤烟籬落隔溪橋
趨虛人去林皋靜
時有晚鴉銜墮樵

劉左司昂 一十一首

昂字之昂興州人大定十九年進士曾高而下
以科名相踵者七世矣昂天資警悟律賦自成
一家輕便巧麗為場屋捷法作詩得晚唐體尤
工絕句往往膾炙人口張秦娥者頗能小詩其
賦遠山云秋水一抹碧殘霞幾縷紅水窮霞盡

處隱隱兩三峯其後流落之昂贈詩云遠山句
好畫難成柳眼才多總是情今日衰顏人不識
倚爐空聽煮茶聲又云二頃山田半欲蕪子孫
零落一身孤寒窗昨夜蕭蕭雨紅日花梢入夢
無娥為之泣下屏山故人外傳記之昂早得仕
年三十三省掾考滿授平涼路轉運副使人謂
卿相可坐致矣術士有言之昂官止五品者之
昂自望者甚厚不信也俄丁母憂為當塗者所

忌連蹇十年卜居洛陽有終焉之志有薦其才
於道陵者泰和初自國子司業擢左司郎中將
大用矣會遼陽人大中欲搖執政賈鉉為言者
所劾辭連之昂道陵震怒一時聞人如史肅李
著王宇宗室從郁皆譴逐之鉉尋亦罷政之昂
降上京留守判官道卒竟如術者之言

醉後

禪僧勸讀傳燈錄道士教行進火功今日興來俱破戒

金五口五
卷四
黃花籬落醉西風

山中雨

嵩高山下逢秋雨
破繖遮頭過野橋
此景此時誰會得
清如窗下聽芭蕉

都門觀別

買酒消閒愁剪刀
剪流水閒愁不可消
流水無窮已悠悠
窗下斷腸波總是行人墮
淚多門外馬嘶思遠道
小
頻猶唱渭城歌
歌聲未斷征鞍發
望斷垂楊人影滅
斜

陽照影却歸來
兩地相望今夜月
闌人多矣
主人翁離別都歸
一笑中陌上行人
終不悟年年楊柳
怨春風

客亭

折盡官橋楊柳枝
春風依舊綠絲絲
啼鶯為向行人道
離別何時是盡時

山堂

山雨溪邊過
山堂夜獨吟
悠悠松上月
照見壁間琴

弔張維翰維中兄弟

蓮幕清曹粉署仙福兮禍倚豈其天座隅異物鵬來止
地底佳城馬不前萬里青雲今已矣兩枝丹桂竟徒然

阿奴莫愛聲名好碌碌持家亦自賢

維翰名甫第一人
擢第維中名庸此

榜乙科阿奴謂冉冉字維賢後以省元
登科兄弟科名如此近世所未有也

即事二首

雨洗明河畫扇收胡床露冷藥闌秋牆陰未得中庭月
一點螢光草際流

又

山花山雨相兼落溪水溪雲一樣閒野店無人問春事
酒旗風外鳥闌關

歌風臺

劉項興亡轉燭過亂蟬吟破漢山河長陵卧老咸陽月
沛上猶傳擊筑歌

弔李仲坦

仲坦物故後省試魁始有特恩之命

文章巧與世相違身後新恩事已非不及萋萋原上草
一番春雨綠如衣

王官谷

潛溪時照塵埃客微雨不遮天柱峯斜日落花人去盡
淡烟樓閣數聲鐘

魏內翰搏霄 三首

搏霄字飛卿初用蔭補以薦書從事史館明昌
中宏詞中選授應奉翰林文字未幾卒飛卿詩
以富艷稱如張公子席間賦嵩山筆力豪逸党
承旨許其在劉無黨之上云

送河南府尹張壽甫赴闕

夜半恩綸出漢宮，朝家虛席待燕公。
春風已徧湖山外，元氣還歸鼎鼐中。
侍從定誰陪白鳳，低回空自惜冥鴻。
洛川萬頃蒲桃碧，長與清愁日夜東。

田若虛遊龍門寶應用天隨子體賦詩因次其韻
二首

少室右臂禹所斷，開排清伊來高寒。
土肉養石自古秀，山腰流泉無時乾。
佛髻滴滴染溼翠，松風颼颼鳴驚湍。

白傳已矣不可見予誰從之投歸鞍

又

闕塞若廐馬奔騰多竒厖慙爾不可沮西來何恹恹
足忽勒破英才如拘龐有客善體物新詩留僧窗晏輩
豈足道微瀾生盆缸徑續杞菊意來浮玻璃江吏部昔
竄謫猶能題臨瀧况此六大寺破堂時鳴椿紫翠出萬
瓦天風旋珠幢興寄百斛鼎無才誰其扛會聽項籍約
吾將從之降

王隱君礪 一十三首

礪字逸賓先世家臨洛至逸賓遂為汴梁人博
學能文不就科舉孝友天至非其食不食家無
甌石之儲晏如也明昌中故相馬吉甫惠迪判
開封舉逸賓王彥功游宗之德行才能逸賓得
鹿邑主簿就乞致仕彥功以親老調鞏州教官
宗之讓不受三人者雖出處不齊而時人皆以
高士目之間間公嘗集黨承旨趙黃山路司諫

劉之昂尹無忌周德卿與逸賓七人詩刻木以
傳目為明昌辭人雅製云

莫春郭南

大梁城外孤臺傍烟昏水碧春林芳憑高極目見歸鴈
風物令人思故鄉紫金山下斜陽莫萬里川光照雲樹
山間細雨花落時何人來往東風路

記南塘所見簡孟友之

大橋南郭野橋東十里垂楊十里風渺渺烟波連御道

離離雲稼入郊宮
雨滋蔓草曉逾綠
日暎荷花晚更紅
登覽只宜開笑口
尊前六客四衰翁

次文遠韻

野性唯便閭寂居
蒼苔鳥跡滿庭書
林花過雨紅猶重
籬竹和烟翠亦疎
已與農人成保社
更令兒輩學畊鋤
賞音只有東郊客
日袖新詩到敝廬

謝竹堂先生見過

學稼古寺側
結廬高柳陰
音書故交絕
歲月杜門深
新

雪添衰鬢寒灰死壯心西州賢別駕連日肯相尋

次友之秋日雨後韻

洛州秋雨後幽勝可供閒白首留他縣歸心遶故山野
泉來竹底危磴入雲間尚記登高會重品細菊斑

寓居南村

朝來出門無所適野徑雨晴沙不泥鼓笛誰家賽春社
杖藜隨過柘岡西

雜詩七首

陰陰綠樹閣庭除散盡鳴禽靜有餘
獨對爐薰坐終日
會心惟有漆園書

又

瓦爐柏子細烟消閒讀禪經破寂寥
風細月高人已靜
隔窗疎竹夜蕭蕭

又

晴日南溪物色饒草芽新綠凍全消
金絲柳底洲沙沒
數尺流波拍野橋

又

南畝東臯春務時
田家候雨罷
畊犁却汲井泉澆藥圃
更疏陂水灌麻畦

又

竹繞沙村水漫流
鷓鴣瀟瀟對沈浮
一竿便擬從漁父
卷置琴書買釣舟

又

屋頭叢木撼蒼烟
風卷飛花到枕邊
南寺有僧來問字

打門驚覺午窗眠

又

漢梁王苑古臺西秋思紛紛獨杖藜雲壓高城鴈飛盡
一聲寒角夕陽低

劉治中濤 六首

濤字及之夏津人明昌二年同進士用戶部尚
書孫鐸薦入翰苑歷太原運副汾州倅入為太
子贊善以彰德治中致仕尋卒沁南節度康瑋

良輔葬之林慮之寶巖

小雪

黃紬被暖起還慵
小雪經簷落旋空
舊館簿書寬半餉
冷官庭戶滿西風
馬道其窘三山瘦
人坐詩工五鬼窮
安得東風囑桃李也教春色到衰翁

和德卿雪

南華香火是真依
不學呼鷹雪打圍
梁苑舊遊荒徑改
頽濱新唱綵箋飛
春生東閣酣朝飲
寒入西鄰泣夜機

夢寐扁舟釣江水重嗟白髮此心違

井陘

寒厭歲崢嶸山陰日少晴敗眠雞小梗勸坐火多情便
面堪長路牽頭破老兵誰教戀升斗盡室此途行

宿平遙集福寺

院僻和僧靜門間與晝長燕泥朝雨淖蝶藥晚風香野
興煎詩思乾愁繞客腸青奴如解事供我莫窗涼

送王純叔守曹州

柏路人看御史駸年來眼落簿書鼓單車乍別金鑾月
五馬頻嘶玉勒風故國山河連小鄆舊家雞犬識新豐
遙知別夜詩成處醉袖淋漓蜜炬紅

戲用前人語題天平別墅

表聖當年絹五千休休亭下買林泉黃華面目君還見
天柱峯高不值錢

劉左司中 二首

中字正夫漁陽人屏山故人外傳云正夫為人

短小精悍滑稽玩世中明昌五年詞賦經義第
詩清便可喜賦甚得楚辭句法尤長于古文典
雅雄放有韓柳氣象教授弟子王若虛高法颺
張履張雲卿皆擢高第學古文者翕然宗之曰
劉先生以省掾從軍南下改授應奉翰林文字
為主帥所重常預祕謀書檄露布皆出其手軍
還授左司都事將大用矣會卒有文集藏於家
周德卿嘗謂正夫可敬從之可愛之純可畏皆

人豪也

冷崑公柳溪

斗印輕拋繫肘金故園風物動歸心
柳含烟翠絲千尺
水寫天容玉一尋山色只於閒裏好
風波不似向來深
人間桃李栽培滿換得溪南十畝陰

龍門石佛

鑿破蒼崖已失真又添行客眼中塵
請君看取他山石
不費工夫總法身

路司諫鐸二十六首

鐸字宣叔伯達之子與弟鈞和叔父子俱有重
名而宣叔文最奇尤長於詩精緻溫潤自成一
家任臺諫有古直臣之風貞祐初出為孟州防
禦使城陷投沁水死有虛舟居士集得之鄉人
劉庭幹家

書州驛壁

雉堞俯已見羊腸行尚難
炊烟界沮水老木識橋山
時

廢無人弔臺高有鳥還客懷秋館雨未老鬢先斑

王子端挽辭

才名如此不償窮再入承明一病翁白髮光陰文字裏
黃華林麓畫圖中謫仙猶想屋梁月荆產空懷松下風
聊應世緣緣故在會看歸鶴語遼東

慶壽寺晚歸

九陌黃塵沒馬頭眼明佛界接仙洲清溪照眼紅蕖晚
禪榻生涼碧樹秋少室宗風開木義裕陵遺墨爛銀鈎

對談不覺山銜月只為松風更少留

賦文室碧玉壺善甫賦詩鐸亦奉和二首

心知雲路等榆枋戲作方壺當玉堂虛靜自應詳止止
逍遙均是一蒼蒼心含寶月無中外身著青霞可頡頏
政爾天遊到疑始覺知誰送竹風香

又

隨人作計魚千里知命無憂鳥一天碧落雲深堪避世

碧落洞名九華烟暖可忘年平章萬有歸玄覽收拾方心入

大圓上界真人自官府不妨聊作橘中仙

次韻答季通

華顛何意軟紅塵霄漢聊收退鷁身方喜長松倚東野
又從淨社得遺民高山流水知音少霽月光風發興新
賴有好詩相慰藉不然開口欲誰親

雨中

月翳有時吐風薰俄自清雲迴暑天影雨進夜窗聲眠
聽參天籟神游得化城覺來還故處饑鼠撼燈檠

輞川

畫圖風景是亭榭
歲年非秋色半黃
落人烟深翠微暗
溪魚得計杳靄鳥
忘機觸物增惆悵
吾廬早晚歸

高唐劉氏駐春園

風光去人無咫尺
人自塵勞不相及
此心既定境從之
雪樹霜林亦春色
劉翁有道久陸沈
十年種樹今成陰
醉鄉天地白日永
鷓鴣栗留皆好音
良晨行樂今已矣
依舊東流泛蘭芷
誰道青春挽不留
鯉庭看取新桃李

金
卷四
膏車秣馬吾將歸誓與清景相追隨安用苦求三徑資
明月常滿千家墀

赫仲華求賦鄴臺張氏野堂

白沙翠竹小江村路轉西郊隅市塵入坐好山如有素
忘情鷗鳥澹相親芋魁飯豆平生足澗草嵩花各自春
得酒誰能更羈束不妨倒著白綸巾

題鄒公所藏淵明歸去來圖

牛刀小試義熙前一日懷歸豈偶然有意候君門外柳

無機還我酒中天
貞姿佳菊秋霜裏
真意南山夕鳥邊
善學展禽唯此老
萬人海裏小斜川

衛州贈子深節度

淇上風光萃一樓
尊前北海百無憂
平分玉鑑漁村晚
西望黃雲寡婦秋
望一卷斜照鈎簾納
烟翠微颺高枕看
安流梅天消息和
羹近老穉寧容挽
鄧侯

潼關

樓迥臨飛鳥
車行汗十牛
地靈開翠壁
天遠送黃流
趣

戰如奸計當關豈壯猷
天梯且失守况說土山頭

七夕與信叔仲荀會飲晚歸有作

秋香瀉月笑談香飲散
歸來夜未央闕角星河搖淡影
柳行燈火試新涼
雄飛勲業歸時輩
信美江山著漫郎
萬事浮雲心鐵石
休將梁國嚇蒙莊

襄城道中

有言長官
暴橫者

禾黍低風汝水長
遲遲驛騎困秋陽
病軀官事交相礙
夢雨行雲肯借涼
盡說秋蟲不傷稼
却愁苛政苦于蝗

詩成應被西山笑，已灸眉頭尚否臧。

感寓

泫泫一水抱山流，路轉岡陵到渡頭。
張翰秋風動歸興，惠崇烟雨著孤舟。
祿輕道重從三黜，日暮人遙發四愁。
世事悠悠莫回首，聊憑酒聖作天游。

冠氏雨中

氣肅關河萬綠摧，遠遊節物動悲哀。
人牛不見曉烟重，草樹有聲山雨來。
老矣何堪米鹽事中，之安得聖賢盃。

遙憐鶴髮孤雲底日望林梢一葉迴

細香軒三首

花氣爐烟總不同
暎青噴翠小窗風
中邊故嗅渾無有
心跡相忘忽暗通

又

閣雨含風戶牖涼
聞機才發興何長
無心孤竹那能爾
自是詩人知見香

又

霜雪青青玉一叢肯從桃李借薰釀不知香界何從立
憑仗清風問籙龍

芳梅如佳人贈襄城衛昌叔

芳梅如佳人不見令人思豈無桃李顏夏蟲篤於時霜
風靜天宇瀾悴菊亦衰凌寒一笑粲功烈如彼卑幾年
幽西路赭岡望逶迤思之不得見空吟水曹詩夜月將
夢去雲深水之湄邂逅疎竹邊莪莪認風儀今日真見
止昨夢猶著龜塵中儻擬子謂我酷好奇逃空聞足音

此心胡不夷

遂初園詩

間間堂

行邁已自勞坐忘猶有為
動靜二塵耳一真非即離
舉頭見青山曲肱轉黃鸝
心安萬境寂境轉何妨隨

思玄堂

塵世一何隘永懷耿中情
端著得吉卜有鶴戾天鳴
慨然趣予裘雲旗渺遐征
鴻濛偶相值笑我勞經營
駕言還故鄉方寸以道寧
先疇理耘耔初服紉芳馨
諦觀九

州事曾不出戶庭漁父有默識舖饋愈於醒

汴梁公解西樓二首

官舍誰言隘西樓興不窮閒雲欹枕裏飛鳥捲簾中風

定天還水烟虛月度松回觀猶有愧破屋著盧仝

盧仝以方

處士王逸賓

又

雲態看來變蒼陰坐次移一蟬吟未了雙鳥去何之薄
宦槐安夢浮名劍首炊安心元有法遣興可無詩

次韻鄴著作病起

玄晏耽書昔坐癡如今手板對山持
病知居士安心處貧是詩人換骨時
單見敢參東觀論徐行休歎後山遲
山林朝市元無異怨鶴驚猿自不知

師拓 一十二首

拓字無忌平涼人舉進士不中明昌中有司薦
其才以嗜酒不果作詩有氣象而工於鍊句如
賦鴈云天低仍在眼山沒更傷心溪上云夕陽

明菡萏秋色靜薰葭白曳衝烟鷺紅翻漾水霞
春日池上云水風涼綺席沙日麗金壺燕市酒
樓云氣清天曠蕩露白野蒼涼又荷蒼秋近葉
蓮膩雨餘花大為時人所稱

秋夜吟

阪路太行險波濤滄海深素緼未偶時白髮將盈簪壯
士莫年意游子中夜心拊劍一太息月暗天橫參

浩歌行送濟夫之秦行視田園

霜歛野草白氣肅天宇清開尊酌遠客餞此秦關行秦
關杳杳愁西顧千里蒼茫但烟樹子今行轡鞍秋風想
見秦關雄勝處河流洶洶崑崙來蓮峯秀拔青雲開終
南南走絡巴蜀五陵北望令人哀我本渭城客浪迹來
東征窮齊歷宋嗟何營尚氣慕俠遊梁城信陵白骨委
黃土夷門誰復知侯生拊劍一長嘯作歌誰為聽青天
白日空冥冥不能乘桴入滄海拂衣且欲歸汧涇落魄
高陽歸未得送子西歸空愴情

冬夜二首

雲破月穿牖夜嚴風號隙客子寢不安寒燈照空壁默然
不平事起坐長太息書但記姓名劍本匹夫敵追奔慕
前哲恢張濟時策何意造物兒重此稻梁役興酣氣益
振孤憤遠飄激非無南山雲高卧養虛寂茹芝酌懸流
嘯吟展胸臆聖達豈不念且有不暖席此抱誰與知乾
坤夜寥閔

又

破屋星斗入疎牖霜風生沈沈夜何久杳杳天不明燈
暗飢鼠出月朗棲鳥驚幽意苦盤礴歷落窮八紘貧賤
豈足戚所思天下英盤木無先容竟與枯朽并旃毳脛
纔掩藜藿腹不盈鬱鬱命世才何階伸一鳴僵卧蓬蒿
底要路誰為名恥作埽門謁寧為醴酒行直將叫閭闔
皎皎開寸誠白日下留照廓廓賢路亨此志恐未必搖
蕩熱中情

游同樂園

晴日明華構繁陰蕩綠波蓬丘滄海遠春色上林多流
水時雖逝遷鶯暖自歌可憐歡樂極鈺鼓散雲和

陪人遊北苑

甲子
歲

繫馬溪邊酌啼鶯柳外聞望長魂欲斷愁豁酒微醺草
色明殘照江聲入暮雲故園春色到歸思日繽紛

曲江秋望

山遠嶂重出野平天四圍涼風芟實坼久雨藕花肥水
濶漁舟小天長去鳥微紫蒲行處有采采莫盈衣

和王逸賓繁臺詩

憑望憐臺迥長吟苦思荒行雲春郭暗高鳥莫天蒼草
色傷心極松風洒面涼故園兵革外殊覺路途長

贈雲中劉巨濟

雲廓乾坤迥霜摧草樹殘風聲秋晚急月色夜深寒綠
綺音誰會青霄氣自干那知燕市裏把酒得交驩

郡城南郭早望

曉立回塘上何人逸興同柳濃天霽雨萍坼岸含風鳥

影明蒼靄湖光倒碧空
秦川何日到解髮濯清澧

中元後二日

暑謝涼生際庭虛雨過時
天長雲斷續風急樹離披
世態貧逾薄秋光老易悲
燕城寒事早還與舊貂期

和張叔獻題首善閣

岩堯飛閣與雲齊
來凭脩欄日轉西
秦客此時愁欲醉
隴山何處望渾迷
九天花鳥催春事
千里風烟入莫題
久怕殊方看節物
不知今日在丹梯

酈著作權 一十六首

權字元興安陽人作詩有筆力圃田道中云斷
橋經壞屋古道入崩山石礧云蒼崖秀苔花壞
道補石棧徐行下井底斗上出天半綺岫宮云
離宮歸相望百年幾遊歷獨知窮已樂衆懟不
汝恤繁花忽灰燼歲月空瓦礫赤水道中云水
近嗟寒氣星殘曳白芒燒痕云炎威隨變滅餘
燼委丘壤田疇更斷續原隰依下上班班澗溪

毛往往漏尋大晴空墮雪影夕照壓秋嶂昆明
翻刮灰黑水走濁浪烟中一線來細路入空曠
蔣石甕云雲間兩石角相鬪如闕門上連石甕
口豁訝愁猱猿朽如空洞腹瑩滑無纖痕何年
補天手月斧雲為斤琢成蒼玉甌覆此玻璃盆
龍潭云臺高野望遠地僻春意閒郊行云強引
村醪終少味漫留詩句嬾題名村行云瘦藤籬
角蔓雜草樹根花夾道懸新棗荒畦卧晚瓜又

云歲豐人樂社秋近客思家書事云佳樹漲新
綠危藁棲老紅與顯叔云茶竈翻春白糖床滴
曉紅雜詩云樹影僧攜錫鈴聲客到門片月冷
千嶂敗橋通兩村此類甚多元輿父瓊國初有
功仕至武寧軍節度使元輿以門資叙宦不達
朝廷高其才明昌初以著作郎召之未幾卒有
坡軒集行於世

聞砧

玉關消息到長安處處砧聲搗夜闌想得月殘哀響斷
一燈清淚剪刀寒

夷門遣懷

梁園花木艷精神盡屬東風點綴人雪壓老梅香不起
問君消息幾多春

西游雜詩

茅店雞聲外柴車犬吠間疎星涵積水殘月墮昏山好
夢人何在秋風我獨還梨園有名酒聊此慰間關

慈恩寺塔

慈恩石刻半公卿時遇聞人為指名龍虎榜中休著眼
一篇俚賦悟平生

木犀

菊小未堪摘荒池悴芙蓉窮秋不慰眼幽獨將焉如殷
勤葢宮子種桂庭之除乘間弄餘花散落荒山隅從茲
雲月裔漂泊生江湖娟娟耐凍枝便與羣芳殊琉璃剪
芳葆蛾黃拂仙裾唾袖花點碧漱金粟生膚好風一披

拂九里香縈紆蘭蕙不敢友荃蓀正僮奴妄意此尤物
化工異吹噓不然九天香安得獨付渠託物寄深縕古
今一三閭收攬名草木自比君子徒惟茲不挂口無乃
聖不居抑夫古簡編斷缺秦火餘君看齊魯臣史筆逸
其書惜哉不可曉臨風為嗟吁尤憐元祐前不及附歐
蘇末路益可惜例進宣和初仙根豈易致百死不一甦
昔游汴離宮識此傾城姝摩娑三品石尚想狎客娛却
後十五年微霜半粘鬚一枝再經眼相對憐羈孤不知

苦何事玉骨乃爾癯故人憐我老尺書遠招呼要趁秋
香濃共此碧玉壺遙知嬋娟客與我笑一俱

竹林寺矮松

蒼烟靄山曲回溪抱脩筠中藏古佛宮荒僻無四隣靈
松插殿脚偃蹇今幾春何年霹靂雨抉石搜潛鱗謫重
飛舉難墮此蜿蜒身聯拳縮爪股氣屈不得伸卧枝老
無力支撐藉樵薪無風自悲吟失水固不神安知才不
才禍福了已分南山聳千嶂直幹排風雲正以中繩墨

中道遭斧斤豈知無用資千歲保其貞何必求先容養
此老困輪我亦愛竒節歲晏守賤貧他時來汝伴露頂
挂葛巾

自鶴壁游善應洹山

清晨發鶴山瘦馬陵峻嶺春風吹雪谷朝霧溼雲影羊
腸抱傾崖絕壑如下井硤闕山却立老眼入絕境人家
跨清溪桑柘鬱數頃西行復幾里崑谷栖短景窮溪水
源清溜溜如細綆下流泉滿山勢合久方騁灘光落鏡

明嵐氣排雨冷何年鑿青壁兩佛入禪定殘僧久零落
遺塔寄烟冥荒涼布金地雜遯樵牧徑同遊成六逸轟
飲助高興留連更坐卧談笑發嘲咏感物復歎嗟醉語
忽逕廷青山不愛寶歲歲出礬礦公場沸千夫利井供百
鼎誰開爭奪源敗此丘壑勝頗思呼有力擲入萬里迥
天神定笑我癡絕謾生癭長懷古畸人飛夢逸箕頽
八渡崖

奔湍百折似蟠虬響入山根匯復流咫尺蒼崖溪八渡

等閒藜杖我頻遊層崖障日樵聲晚寒谷呼風樹影秋
安得剝裁溪上竹一庵領盡兩山幽

留仲澤

朝衫酒溼紫宸霞暫輟旌旗擁使華馳馬彎弓真將種
載書囊筆自名家江湖萬里春回鴈燕趙千林月滿花
明日升沈便霄壤更留玉樹倚薰葭

寄唐州幕官劉無黨

白髮青衫宦苦卑邊荒誰識鳳麟姿河西落魄高書記

卷四
劍外清貧杜拾遺紫玉山高傳楚夢
蠟珠淵靜照黃陂
禁中頗牧他年事先遣江淮草木知

除夜

殊方節物老堪驚病怯諸隣爆竹聲
梨栗異時鄉國夢
琴書此夕故人情眼看歷日悲存歿
淚濺屠蘇憶弟兄
白髮明朝四十七又隨春草一番生

七夕

縹緲針樓外天教彩羽過步雲榆送影
拂月桂交柯繡

縷紫芳袂瓜蓮得巧梭常娥如解妒還與試斜河

濟源廟海子內有二童人以將軍目之投餅餌則

至

我欲燃犀起蟄雷謾誇海蘸紙錢灰將軍不是池中物
也為區區餅餌來

裴公亭

十里蓮塘際碧山入潭無數竹根泉詩狂欲洒亭間壁
却媿文公與樂天

郊行二首

十里脩篁翠拂天
青田漠漠水濺濺
高林忽斷驚回首
不覺竒峰墮眼前

又

溪橋納納馬蹄輕
竹裏人家犬吠聲
行盡灘光溪路黑
隔林燈火夜深明

禮部楊公雲翼 二十一首

雲翼字之美樂平人明昌五年經義進士第一

人詞賦亦中乙科天資穎悟博通經傳至於天文律歷醫卜之學無不臻極事母孝與人交款曲周密處事詳雅而能以大節自任南渡後二十年與禮部間間公代掌文柄時人號楊趙而公以後輩自處不敢當也宣宗頻歲南伐事勢有決不可者論議之際時相多以避嫌不敢言公獨直言極諫以為兩淮生靈皆陛下赤子不能外禦北兵而取償於宋以天下為度者不如

是也是後再出兵時全一軍幾為宋人所覆宣
宗悔悟責主兵者曰我當何面目見楊雲翼耶
興定末拜吏部尚書中外望其旦莫入相竟以
足疾不果正大五年八月終于翰林學士年五
十九謚曰文獻天下識與不識皆哀惜之至今
評者以為百餘年以來大夫士身備四科者惟
公一人而已子恕字誠之第進士今在燕中

陽春門堤上

薄薄晴雲漏日高
雪消土脉潤如膏
東風可是多才思
先送輕黃到柳梢

光林寺

煙浮霜塔閉禪關
今落先生杖屨間
碧水同來弄明月
黃塵不解汙青山
因緣多自成三宿
物我終同付八還
欲識光林全體露
松花落盡嶺雲間

上白堦寺

睡飽支筇徹上方
門前山好更斜陽
苔連碧色龜趺古

松落輕花鶴夢香身世窮通皆幻影山林朝市自閒忙
簾幙不動天風靜莫聽鈴中替戾岡

聞韶圖

千古神交寄至音聞韶想見聖人心容聲便落筌蹄外
後學休從肉味尋

張廣文消搖堂

方寸間田了萬緣大空物物自脩然鶴鳧長短無餘性
鵬鷗高低各一天身內江湖從濩落眼前瓦礫盡虛圓

叩門欲問姑山事
聾瞽由來愧叔連

侯右丞雲溪

功成何許覓菟裘
天地雲溪一釣舟
夢破煩襟濯明月
詩成醉耳枕寒流
西風歸興隨黃鵠
皎日盟言信白鷗
政恐蒼生未忘在
草堂才得畫中游

大秦寺

寺廢基空在人歸
地自閒綠苔昏碧
瓦白墻映青山暗
谷行雲度蒼煙獨
鳥還喚回塵土夢
聊此弄澄灣

蔡村道中

水連深竹竹連沙村落蕭蕭已莫鴉行盡畫圖三十里
青山影裏見人家

戴嵩畫牛

春草原頭雨溼烟夕陽渡口水吞天披圖坐我風蓑底
一夢長林二十年

迴文

梧井落花秋寂寂竹窗搖月夜沈沈孤鸞舞處回腸斷

遠鴈來時別恨深

烟雨

涼氣先秋至重陰接望迷
有無山遠近濃澹樹高低
鳥雀枝間露牛羊舍北泥
支頤政愁絕風雨過前溪

和呂介甫

山下三秋雨山中六月涼
樹林溪谷暗花藥小闌香
夢破風開卷詩成鳥送觴
紅塵多內熱政爾救頭忙

謾興

乍寒簾幙一燈青
從更羈情爾許清
葉擁西風秋有思
天垂北斗夜無聲
吟蛩遶夢家千里
過鴈連愁月四更
寄語黃華耐岑寂
好看霜葉到歸程

雙成寺中登樓

雲意生陰晚不收
西風疎雨一江秋
畫圖忽上闌干角
隱隱平灣轉釣舟

父老

寄樂平令
胡德玉

老去宦情薄
秋來鄉思多
遙憐桑壠在
無奈棘林何
白

水青沙谷黃雲赤土坡幾時隨父老社酒太平歌

應制雪詩

陰雲破牖不曾晴瑞雪隨風落五更積玉未平鳩鵲瓦
飛花先滿鳳皇城潤深農畝千疇綠塵壓龍沙萬里清
最好壽杯浮喜色明年洗眼看昇平

元日

香炷猶餘去歲烟五更斗柄已回天來從天外春何早
俵向人間老不偏莫問流光似流水且從今日數今年

東風五十七年夢夢覺還驚雪滿巔

太一湫

西崖環抱鏡光平數畝澄泓石底清寒入井頭千丈雪
淨涵崑際一天星傍人爭出魚依勢銜葉飛來鳥護靈
日日東風送潮出只應絕頂透滄溟

應制白兔

聖德如天物効祥褐夫新賜雪衣裳光搖玉斗三千丈
氣傲金風五百霜禁籞合樓瑤草影御爐猶認桂枝香

中興慶事光圖譜黼坐齊稱萬壽觴

李平甫為裕之畫繫舟山圖閒閒公有詩某亦繼

作

名利走朝市山居良獨難况復山中人讀書不求官東
崑有佳致書室方丈寬彼美元夫子學道如觀濶孔孟
澤有餘曾顏膏未殘向來種德深直與山根蟠之子起
其門孤鳳騫羽翰計偕聊爾耳平步青雲端竭來遊京
師士子拭目觀禮部天下士文盟今歐韓一見折行輩

殆如平生歡舞雩詠春風期著曾點冠五言造平淡許
上蘇州壇我嘗讀子詩一倡而三歎世人非無才多為
才所謾高者足詆訶下者或辛酸吾子忠厚姿不受薄
俗漫晴雲意自高淵水聲無湍他日傳吾道政要才行
完會使茲山名與子俱不刊

間間公為上清宮道士寫經并以所養鶩羣付之
諸公有詩某亦同作

會稽筆法老無塵今代間間是後身只有愛鶩緣已盡

舉羣還付向來人

屏山李先生純甫

二十九首

純甫字之純弘州人承安闕年進士仕至尚書

右司都事為舉子曰自不碌碌於書無所不
闕而於莊周列禦寇左氏戰國策為尤長文亦
畧能似之三十歲後徧觀佛書能悉其精微既
而取道學書讀之著一書合三家為一就伊川
橫渠晦庵諸人所得者而商略之毫髮不相貸

且恨不同時與相詰難也性嗜酒未嘗一日不
飲亦未嘗一飲不醉眼花耳熱後人有發其談
端者隨問隨答初不置慮漫者知所以統室者
知所以通傾河瀉江無有窮竭好賢樂善雖新
進少年游其門亦與之為爾汝交其不自貴重
又如此迄今論天下士至之純與雷御史希顏
則以中州豪傑數之子全字稚川今居鎮陽

雪後

玉環暈月蟠長虹飛沙卷土號陰風黃雲翼翼翳晴空
屋頭唧唧鳴寒蟲天符夜下扶桑宮玄冥震怒鞭魚龍
魚龍飛出滄海底咄嗟如律愁神工急斲北斗捲雲漢
凌澌捲入天瓢中椎璋碎壁紛破碎六花剪出寒瓏璵
翩翹作穗大如手千竒萬巧難形容恍如墮我銀沙界
清光縞夜寒臃腫肝腸作祟耿無寐試把往事間追窮
男兒生須銜枚卷甲臂琯弓徑投虎穴策竒功不然羊
羔酒漲玻璃鍾侍兒醉臉潮春紅誰能蹇驢馳著灞陵

東骨相酸寒愁煞儂屏山正吐黃蘗氣笑倒坐間亡是
公

赤壁風月笛圖

鉦鼓掀天旗脚紅老狐膽落武昌東書生那得麾白羽
誰識潭潭蓋世雄裕陵果用軾為將黃河倒捲湔西戎
却教載酒月明中船尾嗚嗚一笛風九原喚起周公瑾
笑煞儋州秃鬢翁

送李經

髯張元是人中雄喜如俊鷓盤秋空怒如恠獸拔古松
老我不敢嬰其鋒更著短周時緩頰智囊無底眼如月
斫頭不屈面如鐵一說未窮復一說勅敵相扼已錚錚
二豪同軍又連衡屏山直欲把降旌不意人間有阿經
阿經瓌竒天下士筆頭風雨三千字醉倒謫仙元不死
時借竒兵攻二子縱飲高歌燕市中相視一笑生春風
人憎鬼妒愁天公徑奪吾弟還遼東短周醉別默無語
髯張亦作衝冠怒阿經老淚如秋雨只有屏山拔劍舞

拔劍舞擊劍歌人非麋鹿將如何秋天萬里一明月西風吹
夢飛關河此心耿耿軒轅鏡底用兒女肩相摩有智無智
三十里眉睫之間見吾弟

張謂伯玉
周謂晦之

為蟬解嘲獻

臣伯玉不
平蟬解

老蜨破衲染塵緇轉丸如轉造物兒道在夫溺傳有之
定中幻出嬋娟姿金仙未解羽人尸呼風飲露巢一枝
倚杖而吟如惠施字字皆以心為師千偈瀾翻無了時
關棧不落詩人詩屏山參透此一機髯弟皤兄何見疑

此理入玄人得知髯弟恐我食却西山秀

張有登樓詩
昨日上高樓

西山翡翠堆今日上高樓西山如死灰想見屏
山老療飢西山隈食却西山色高樓空崔嵬

曄兄勸

我吸却壺盧溪

高有壺溪詩云我觀壺溪未可以蠡測
大若溪上翁有口吸不得壺中別是一

洞天溪上翁即壺中仙畢竟人
間無著處杖頭挑取屏山去

因蟬倩我問渠伊快掉

葛藤復是誰髯弟絕倒皤兄嘻

灞陵風雪

君不見浣花老人醉歸圖熊兒捉轡驥子扶又不見玉
川先生一絕句健倒莓苔三四五蹇驢駝著盡詩仙短

策長鞭似有緣政在灞陵風雪裏管是襄陽孟浩然官
家放歌殊不惡蹇驢大勝揚州鶴莫愛東華門外軟紅
塵席帽烏鞞老却人

贈高仲常

借問高書記南征又北征從軍元自樂遊子若為情筆
下三千牘胸中百萬兵傷弓良小怯彈鋏竟何成慘淡
風塵際悲涼鼓角聲別家四十日並塞兩三程斗絕牛
皮嶺荒寒燕賜城吟邊白鳥沒醉裏莫雲橫感慨悲王

粲巔狂笑禰衡虎賁多將種底用兩書生

真味堂

問渠真味若為言不著鹽梅也自全齏鼎大夫徒染指
麴車公子漫流涎胸中已有五千卷徽外更聽三兩絃
此老清饒何所嗜宦名嚼蠟已多年

畫兔

三窟言何鄙中林計未疎貧而長衣褐老矣不中書搗
藥元無死忘蹄始見渠子皮今尚在遺像豈陶朱

猫飲酒

枯腸痛飲如犀首奇骨當封似虎頭嘗笑廟謀空食肉
何如天隱且糟丘書生幸免翻盆惱老婢仍無觸鼎憂
只向北門長卧護也應消得醉鄉侯

天游齋

丈人未始出吾宗草靡波流盡太冲七竅鑿開無混沌
六根消落盡圓通法身兔角聲聞外塵事牛毛夢幻中
誰會天游更端的瘦梅疎竹一窗風

孫卿子

諸儒談性盡歸情誰信黃河徹底清未到崑崙源上見
且休容易小荀卿

謝安石

阿堅休道不英雄兒輩俄成蓋世功屐齒折時渠自著
至今人解笑桓冲

魏徵

健兒搖足據山東李氏家居大半空貞觀力排封建議

魏徵元只是田公

老蘇

宋季人憂大瓠穿敢留金幣不輸邊權書更信蘇家策
剝費青苗幾倍錢

偶得

包裹青衫已十年聰明更覺不如前簿書叢裏先抽手
鼓笛場中少息肩瓶底剩儲元亮粟又頭高挂老坡錢
會須著我屏山下了却平生不問天

雜詩六首

顛倒三生夢飛沈萬劫心
乾坤頭至踵混沌古猶今
黑白無真色宮商豈至音
維摩懶開口枝上一蟬吟

又

乾坤大聚落今古小朝昏
諸子蠅鑽紙羣雄虱處禪
一心還入道萬物自歸根
却笑幽憂客空招楚些魂

又

丹鳳翔金鼎蒼龍戲玉池
心源澄似水鼻息細於絲
枕

上山川好壺中日月遲
神仙學道者那許小兒知

又

空譯流沙語難參少室禪
泥牛畊海底玉犬吠雲邊
仰嶠圓茶夢曾山放酒顛
書生眼如月休被衲僧穿

又

狡兔留三窟獼猴戲六窗
情田鋤宿草心月印澄江
酒戒何曾破詩魔先已降
雄蜂雌蛺蝶正自不成雙

又

道義富無敵詩書貴不貲浮生幾兩屐狂樂一絢絲豪
俠非吾友臞儒即我師誰知茅屋底元自有男兒

趙宜之愚軒

羿窮射殺金畢逋老盧磔殺玉蟾蜍朝夕相避崑崙墟
忽見天公一目枯塵昏土眯萬萬古雲眇雨淚寒糝糊
嗟哉區中人么麼如虬蟬書生不惜兩瞳子長使看書
如老奴水部一竒士西河君子儒二公正坐詩作崇得
句令人不敢書先生有膽乃許大落筆突兀無黃初軒

昂學古澹家法出關雎暗中摸索出奇語字字不減瓊
瑤琚神憎鬼妒天公阻戲將片雲翳玄珠九竅鑿開混
沌死罔象未必輸離朱靜埽空花萬病除一片古心含
太虛屏山有眼不如無安得恰似愚軒愚安得恰似愚
軒愚

子端山水同裕之賦

遼鶴歸來萬事空人間無地著詩翁只留海岳樓中景
長在經營慘淡中

馬圖同裕之賦

韓筆定襄霍益之家物

天馬飛來不苦難
雲屯萬騎開元間
太平有象韓生筆
曾見真龍如此間

瓢庵

書生只合飽黃齏
大嚼屠門計似癡
壁上七絃元自雅
囊中五字更須竒
橫陳已覺如嚼蠟
皆醉何妨獨啜醅
此味欲談舌本強
如人飲水只渠知

劉宋

六十衰翁血打圍深山赤手搏熊羆子孫只解相魚肉
辛苦知他為阿誰

哭黃華

士價五羊皮人生黍一炊蓋棺那可忍挂劍不勝悲向
上誰曾到而今渠得知侍臣傷立本老姥怒羲之作病
無如酒窮愁正坐詩中郎猶有女少傅竟無兒散落真
行帖飄零騷雅辭儒林頓憔悴未敢哭吾私

怪松謠

阿誰裁汝來幾時輪囷擁腫蒼虬姿鱗皴百恠雄牙髭
拏空天橋蟠枯枝疑是祕魔崑中老慵物旱火燒天鞭
不出睡中失却照海珠羞入黃泉蛻其骨石鉗沙錮汗
且僵埋頭卧角政摧藏試與摩挲定何似怒我振觸鬚
鬚張壯士囚縛不得住神物世間無著處隄防夜半雷
破山尾血淋漓飛却去

虞舜卿送橙酒


屏山持律不作詩硯塵筆秃繁蛛絲枯腸燥吻思夏夏

法當以酒疏滄之何物督却風味惡振觸間愁無處著
苦思新釀壓橙香世間那有揚州鶴乞詩送酒並柴門
瀛洲仙裔令公孫肺腸情瘁芒角出傾瀉長句如翻盆
胸中雲夢大老我眼皮危塞破徑呼短李與黔王

錦囊收玉唾

收叔
士衡

中州集卷四



總校官庶吉士臣侍朝

校對官庶吉士臣陳文樞

謄錄監生臣沈元錡